

菩薩戒本經箋要

新平知覺

回 向

願以此功德。莊嚴佛淨土。上報四重恩。下濟三塗苦。
十方苦衆生。悉發菩提心。盡此有緣身。同生極樂國。

菩薩戒本經箋要

慈氏菩薩說

北凉天竺三藏曇無讖第二譯

北天目藕益沙門智旭箋

○大文為三。初歸敬述意。二正列戒相。三結示宗趣。初及第三。皆結集家所安。二正列戒相。出瑜伽師地論菩薩地戒品中。識師於地持論。已先譯竟。今更譯出別行。故稱第二譯也。

○初中四。初歸憑。二誠聽。三喻讚。四勸持。

○初歸憑

歸命盧舍那。十方金剛佛。亦禮前論主。當覺慈氏尊。盧舍那。此翻淨滿。惡無不斷。故淨。善無不行。故滿。即修德究竟圓極。克證本性。具足三身。恒居報土。乃菩薩戒之大和尚也。十方金剛佛者。金剛道後證不壞性。亦是圓滿報身。與盧舍那。一身一智。慧力無畏亦然。各徧法界。無礙無雜。非一非異。乃菩薩戒之同壇尊證也。慈氏尊者。梵稱彌勒。於前

則為地論主於後則次當作佛。乃菩薩戒之羯磨阿闍梨也。將欲誦戒。故先歸命敬禮以求加被。

○二誠聽

今說三聚戒。菩薩咸共聽。

只此重輕學處。能斷諸惡。即是攝律儀戒。能成諸善。即是攝善法戒。能益有情。即是攝衆生戒也。

○三喻讚

戒如大明燈。能消長夜闇。戒如真寶鏡。照法盡無遺。戒如摩尼珠。雨物濟貧窮。

大明燈者。喻讚攝律儀戒。能斷生死長夜一切惡業愚惑闇也。真寶鏡者。喻讚攝善法戒。能照佛地一切功德智慧法也。摩尼珠者。喻讚攝衆生戒。如如意珠。能雨一切聖財。普濟九界貧窮苦也。

○四勸持

離世速成佛。唯此法為最。是故諸菩薩。應當勤護持。非離世。則不能度世。如岸上人。方可拯溺水人也。故華嚴經普賢常行。亦名離世間品。離世乃下化之本懷。成佛乃上求之夙願。上求下化。惟此三聚淨戒為最。可不精勤護持哉。初歸敬述意竟。

- 二正列戒相二。初明四重。二明四十一輕。
- 初中三。初總標。二別列。三結問。
- 今初

諸大士。此四波羅夷法。是菩薩摩得勒伽。和合說。
波羅夷。此翻棄罪。犯此罪者。永棄佛海邊外故。
又翻極惡。正違勝妙善法故。又翻墮罪。墮在三
塗受苦故。又翻重罪。過惡深重。不易悔除故。摩
得勒伽。此云智母。善釋諸法相義。能生智故。即
指瑜伽師地論也。和合說者。同一住處。不相乖
諍。乃可如法誦戒也。問。梵綱具明十重。此胡
僅列四重耶。答。菩薩戒法。通乎七衆。若優婆塞

優婆夷。必已先受五戒。若沙彌。沙彌尼。必已先受十戒。若式叉摩那。必已先受六法。若比丘比丘尼。必已先受具戒。萬無單受此菩薩戒之理。是故通途根本四戒。已於七衆戒中明之。此不重說。今但申明菩薩增上戒也。又此四戒。失許重受。若殺盜婬妄。犯者須見好相。故不與此同列。又殺盜婬妄。菩薩為衆生故容開。如唐譯本廣明。今此四重。惟遮不開。故獨列之。

○二別列四。第一自讚毀他戒。第二慳惜財法戒。第三瞋不受悔戒。第四謗亂正法戒。

○第一自讚毀他戒

若菩薩。為貪利故。自嘆己德。毀訾他人。是名第一波羅夷處法。

自嘆己德者。揚己德以形他短。毀訾他人者。借人短以顯己長。人已互形。欲令利養盡歸於己。正違大菩提心。故犯重也。若貪心自讚而不毀

他。或恚心毀他而不自讚自在下文輕戒中攝。

○第二慳惜財法戒

若菩薩。自有財物。性慳惜故。貧苦衆生。無所依怙。來求索者。不起悲心。給施所求。有欲聞法。慳惜不說。是名第二波羅夷處法。

菩薩之道。常應財法二施。攝取衆生。自有財物。明其非乏財也。貧苦衆生。明其非越理妄求也。有欲聞法。明其非不堪聞也。慳惜不說。明其非

不知法也。慳悋鄙澁。不起悲心。正違大菩提道。故亦犯重。

○第三瞋不受悔戒

若菩薩。瞋恚。出麤惡言。意猶不息。復以手打。或加杖石。殘害恐怖。瞋恨增上。犯者求悔。不受其懺。結恨不捨。是名第三波羅夷處法。

一念瞋心。已違攝取衆生之道矣。況口出惡言。身行打杖乎。身口加惡。已失慈悲心矣。況拒絕

而不受懺悔乎。棄捨衆生。故失菩薩法也。

○第四謗亂正法戒

若菩薩。謗菩薩藏。說相似法。熾然建立於相似法。若心自解。或從他受。是名第四波羅夷處法。

相似法者。實非正法。有似正法。譬如紫之奪朱。鄭聲之亂雅樂。此即名為謗菩薩藏。非必毀罵。而後謂之謗也。又設毀罵。罪猶稍輕。以不能惑亂人故。說相似法。其罪更重。以最能疑誤人故。

而此熾然建立相似法者。凡有二類。一者若心自解。謂意見穿鑿。邪悟發明。二者或從他受。謂領納邪教。堅黨邪師。此二並違出世正法。故犯重也。二別列竟。

○三結問

諸大士。已說四波羅夷法。若菩薩起增上煩惱。犯一一法。失菩薩戒。應當更受。今問諸大士。是中清淨不。三說諸大士是中清淨。默然故是事如是持。

增上煩惱。謂上品貪。或上品慳。上品瞋。上品邪悟解也。犯一一法。謂四法中隨犯一法也。失菩薩戒。謂失大菩提所感無作戒體也。應當更受。謂應深革前非。重復發起增上大菩提心。對治增上煩惱也。於半月。設有犯者。未誦戒前。必應發露懺悔。既懺悔已。還得清淨。故至正誦戒時。仍與不犯戒者同皆默然。以此默然而表清淨。應恒如是持此戒也。問。設先有犯。忘

而未懺。今誦戒時。方自憶知。為即出衆發露。為仍默然。若出衆發露。則不可結云默然故。若仍默然。則豈不犯覆藏罪耶。答。律有之矣。爾時設自憶知有罪。應向比座同意之人心口發露。俟事畢後。如法悔除。設無同意人可得。應作是念。待事畢已。當向清淨比丘發露悔除。作是念已。雖默坐聽。不犯覆藏罪也。初明四重竟。

○二明四十一輕三。初總標。二別列。三結問。

○今初

諸大士。此菩薩衆多突吉羅法。是菩薩摩得勒伽。和合說。

突吉羅。此翻惡作。即不淨有作罪也。言衆多者。下文雖列四十一條。而每條之中。事非一概故也。

○二別列四十一。第一不供養三寶戒。至第四十一神力不折攝戒。